

Sechaba sa heso,

.  
Kea le lumelisa sechaba, ke ntse ke re ho lona lumelang!

.  
Ke hlaha ho lona kajeno joaloka molula-qhooa oa lona, Hlooho ea 'Musu oa Motlotlehi, ho le hlaba malotsana malebana le litaba tse ka 'nang tsa le ebisa litsebe le ho ruta ntsi ha li sa pepesoe le ho khalengoa ka 'nete.

.  
Moporofeta Hosea (4:6) o re: "sechaba sa ka se timela ke ho hloka tsebo".

.  
Joale, 'na ha ke rate ha le ka hloka tsebo tabeng tse le amang le le sechaba sa Motlotlehi Rabasotho, 'me 'na ke le mohlanka oa lona, esere ka jara sekhobo sa seboholi seo mali a sechaba a tlang ho batloa ho sona.

.  
Taba ea pele ke ena ea tlhahiso ea ho hloka ts'epo ho 'Musu ka Paramenteng.

.  
Ntho ena ha se mohlolo oa letho pusong ea sechaba ka sechaba.

.  
E teng tsamaisong ea liparamente, e teng ka Molaong oa Motheo oa Lesotho.

.  
Se mpang se etsahetse khetlo la pele Paramenteng ea Lesotho ke hore rona ba 'Musu oa Lets'oele le Beta Poho re lumelletse puso ea sechaba ka sechaba (democracy) hore e phethahale ka Lekhotleng la Sechaba (National Assembly).

.  
Sechaba se tla hopola hore ka 2014 teng 'Musong oa Letsema, Tona-kholo Thabane o n'a balehe tlhahiso e joalo ka ho fanyeha Paramente (Prorogation of Parliament) khoeli tse robong (9) kaofela.

.  
Ha SADC e mo phekhola moo, a re ho ka mpa ha uoa likhethong.

.  
Lebaka-baka la Tona-Kholo Thabane la ho fanyeha Paramente le hore ho uoe likhethong tsa 2015 e n'e mpa e le bokaako ba tsie mokopu ba ho ts'aba seo a neng a re ke ho tlotlolloa ka ho hloloa ke tlhahiso ka Paramenteng.

.  
Ke hokae moo phethahatso ea puso ea sechaba ka sechaba (democracy) ka Lekhotleng la Sechaba e kileng ea fetoha tlotlollo?

.  
Mohlolo oa mehlolo ruri, taba e sa tsejoeng!

.  
Taba e 'ngoe e hlonngoeng thupeng haholo, 'me eo ho phonngoang sechaba le ho se roka mahloan'a naketsana ka eona, ke ena ea likhakanyo tsa lichelete.

.  
Ho bolelisakoa ha IEC e se na chelete ea likhetho, 'Muso o tlil'o putlama, bahlanka ba 'muso ba sa tl'o lefuoa meputso, le ha ba bang ba ts'osoa ka teronko, ka la pele 'Mesa, hobane Paramente e sa fetisa likhakanyo.

.  
Ka bokhuts'oanyane, ha ho 'nete kapa taba ea letho lipolelong tsena tse soto!

.  
Ba li buang le bona ba tseba 'nete ea hore ba thetsa le ho lahla sechaba se hlokanang tsebo.

.  
Ba itebatsa ka boomo Temana ea 18 ea Public Financial Management and Accountability Act, 2011 e reng:

.  
"If it appears to the Minister that an Appropriation Act for any financial year will not come into operation by the beginning of the financial year, the Minister may approve withdrawals from the Consolidated Fund in accordance with Section 113 of the Constitution".

.  
Ho feta moo, 'nete e 'ngoe eo ba e tsebang hantle, eo ba mpang ba iphapanyetse eona, ke hore likhetho tsena tsa monongoaha e tla b'e le tsa boraro bonyane tse ts'oaroang ho e-so fetisoa likhakanyo.

.  
Ho bile joalo le maoba mona ka likhetho-tsome tsa 2015!

.  
Likhakanyo li ile tsa tla fetisoa ke Paramente ea borobong ka Phuptjane 2015.

.  
Ba re 'Muso o ne o ntse of sebetsa joang ka 'Mesa le Mots'eanong 2015?

.  
Ke eo potso!

.  
Puke e 'ngoe e ntseng e foqoa sechaba ke hore puso e n'e fetohile ka Paramenteng ka 1997 ha Tona-Kholo Ntsu Mokhehle (moea oa hae o phomole ka khotso) a theha LCD; le ka 2012 ha Tona-Kholo Pakalitha Mosisili a theha DC.

.  
Ha ho joalo ho hang.

.  
Tona-Kholo Ntsu Mokhehle o n'a tsoelepele ka puso hobane a n'a nts'a na le bongata ba litho tsa Paramente.

.  
Ka mokhoa o ts'oanang, le Tona-Kholo Mosisili o n'a tsoelepele ka puso hobane a n'a nts'a na le bongata ba litho tse mo ts'ehetsang ka Paramenteng.

.  
'Muso o n'o ka fetoha joang Tona-Kholo e sa fetoha?

.

Ho neng ho fetohe ka makhetlo ao a mabeli \_- 1997 le 2012 - ke lebitso la phathi ea Tona-Kholo, E SENG 'Musu!

.  
Kea ts'epa taba ena e hlakile kajeno.

.  
Ho seng ho ka sala ke khang ea monna, eo eona Mosotho oa khale a neng a bolele hore e khaoloa ke letlaka.

.  
Libekenyaneng tse tsoa feta mona, 'Musu o ile oa lemoha pelaelo ea hore Monghali Bokang Ramats'ella oa LPC o buile hampe ka Motlotlehi Khosi Letsie III se-ea le-moeeng sa Thaha-Khube (TK) F.M.

.  
Ka nepo Sepolesa se ile sa nka khato ea molao, 'me taba eo e makhotleng a molao joale.

.  
Ts'epo ea rona ke hore ha se Monghali Ramats'ella feela ea tla qosoa, empa bohle ba amehang joaloka seboholi se neng se tsamaisa lenaneong, Bookameli ba se-ea-le-moea, esita le momameli ea ileng a kena lenaneong leo a bua hampe ka puso ea Matsieng - bana bohle ba be shosholong e ts'oanang haeba sepheo le morero ke ho aba toka e le kannete eohle, le ho khalema bohle ba saohang ka lebitso la Motlotlehi Khosi, tlas'a sekhurumetso sa bolokolohi ba puo kapa ho hlahisa maikutlo.

.  
Re sa re re utloile tseo, matsatsing ana re utloile Mohlomphehi Tom Thabane, eo e neng e le Moetapele oa Bohanyetsi Paramenteng ea borobong e tsoa qhaloa, a fihla ka mabifi, a jele masooko, h'a itsoela khateane, 'me a sokela le ho sokela Motlotlehi ka tsela e mo hlokelang hlompho.

.  
Sebokeng sa boralitaba Ntate Thabane o hloketse Motlotlehi Khosi hlompho ka lipolelo tse 'maloa.

.  
Ea pele ke hore o re Motlotlehi o 'matla lehe e se khoho, na Motlotlehi o bona eka lehe le ka tsoa kae ho eena mono.

.  
Ruri puo ena e lihlong, e hobosang, e ke ke ea lebisoa ho Motlotlehi Khosi ke mang kapa mang, empa haholo-holo ke Moetapele oa Bohanyetsi bo ts'epahallang Motlotlehi (Leader of His Majesty's Loyal Opposition); 'me eo maoba mona e neng e le Tona- Kholo, a nkile kano ea bots'ephehi le bohlanga ho Motlotlehi Khosi!

.  
Ho feta moo, hona sebokeng seo sa boralitaba, Ntate Thabane o tlohela Motlotlehi lihlong ka ho bolelisaka hore eena Thabane ha se thaka-mphato ea Motlotlehi, hore eena Thabane ke thaka-mphato ea Motlotlehi Moshoeshoe II (moea oa hae o phomole ka khotso).

.  
'Nete ke hore Ntate Thabane o bua tjena ka sepheo sa ho hobosa Motlotlehi Khosi Letsie III.

.

Taba ea pele ke hore ha se le 'nete hore Ntate Thabane ke thak'a Motlotlehi Moshoeshe II.

.  
Ntate Bereng Seeiso, eo e bileng Motlotlehi Moshoeshe II, o n'a hlahe ka la 2 Mots'eanong 1938, ha Ntate Tom Thabane eena a hlahile ka la 28 Mots'eanong 1939!

.  
Ha se lithaka.

.  
Mohlomong ha ho se ho khomeletsoa, ho sarolloa moelelo oa bothaka, ho ne ho ka iketsisoa ka hore ke mafihlelana-khotla!

.  
Ntate Thabane oa kakamela, o rata ntho tse kholo, tse mo fetang! Empa taba-khoho ke hore Ntate Thabane o tena a tseka bothaka tjena le motsoali oa Motlotlehi ka morero oa ho nyenyefatsa le ho hobosa Motlotlehi!

.  
Ho feta moo, le eona ena ea ho bolelisaka ha Motlotlehi Khosi Letsie III e le thak'a bana ba Ntate Thabane ke puo e tellang le ho hobosa Khosi, puo e ronang Ntate Thabane.

.  
Le haeba a le monyenyanane ka lilemo tsa tlhaho, ruri ka boemo le Ofisi Motlotlehi ke Hlooho ea Naha, ke Rabasotho, e leng hore ke Ntata rona bohle, ba baholo le ba banyenyane.

.  
Hoja Ntate Thabane a ipha botho, a ipha Basotho, a hlompha Motlotlehi Khosi ea Basotho.

.  
Ho seng joalo, a ikhuttlelle khateane koana, moo ho se nang Motlotlehi.

.  
Taba ea boraro, 'me ea ho qetela eo ke tlamehang ho khalema Ntate Thabane ho eona, 'me le eona a e buile hona sebokeng seo sa boralitaba moo a neng a chekile mo-fela-pelo, ke ea ho ts'osa Motlotlehi Khosi ka hore a ka tlosoa Ofising eo ea Hlooho ea Naha.

.  
Ke ne ke mo mametse hantle h'a re: Morena Mohato a tsebe hore motho ea ka Ofising eo a ka tlosoa, a re ha a re a tlosoe hona joale, empa a ka tlosoa"!

.  
Mona teng, ruri Ntate Thabane o itumelletse ho ferekanngoa le ho hloloa ke pelo kapa khalefo ka tsela e hlabisang lihlong ruri.

.  
Mohlomong o nts'a ile le khongoana holimo, a nahana lemo tsa puso ea bompoli ka bo-1970, ha ho fanyehilo Molao oa Motheo, 'me e-ba Motlotlehi Moshoeshe II o isoa Holland ka sheshe; le nakong ea puso ea Masole ka 1990, ha eena Ntate Thabane e le Mongoli oa Lekhotla la Sesole, joale Motlotlehi Moshoeshe II a boetse a isoa Engelane ka sheshe!

.  
Hoja Ntate Thabane a elelloa hore mehla e fetohile, 'me rona Basotho ba kajeno, ba hlomphang Molao oa Motheo oa Lesotho, ba ratang le ho boulella Motlotlehi e le Hlooho ea Naha, e le lebofe le tlamahanyang

sechaba sa Basotho, ha re na ho lumela joang kapa joang, neng kapa neng hore, ho bapalloe ho Motlotlehi Rabasotho ke boralipolotiki - 'motoana ba ferekaneng.

.  
Basotho ba heso, ke fera le ho thetha polelo ena ka ho ts'oela ka mathe lipuo tse hlokanang 'nete, hlomphe le motheo tse buuoang marangrang mona (social media).

.  
Ho petliloe leshano la hore Motlotlehi o saenne litokomane tsa molao tsa ho qhala Paramente ea borobong, le tsa ho bolela letsatsi la likhetho, a supiloe ka sethunya.

.  
Ache, litoro ruri! Ha ho ntho e joalo.

.  
E le mang hona ea ka supang Motlotlehi Khosi ka sethunya?

.  
A ts'epile eng eo a ka e ts'epang?

.  
Hoo e leng 'nete e babelang batho ba bang, joaloka leshokhoa, ke hore Motlotlehi o phethile ts'oanelo ea hae e laoloang ke Molao oa Motheo oa Naha, le Molao oa Likhetho tse Akaretsang.

.  
Tabeng ea ho qhala Paramente Motlotlehi o sebelitse ka keletso ea Tona-Kholo ho ea ka Temana ea 83 (1) le (4) (b); athe tabeng ea ho beha letsatsi la likhetho teng, Motlotlehi o ipapisitse le keletso ea Lekhotla la Naha (Council of State) ho ea ka Temana ea 37 (1) ea Molao oa Likhetho oa 2011.

.  
Basotho, tlohelang ho itumella ho nyants'oa phooko, le ho iphetola nonyana tsa kahlamela 'molai.

.  
Motho ea sa hlomphe Motlotlehi h'a hlomphe sechaba sena sa Basotho!

.  
Ha ho le joalo, sechaba sa heso, a re itokisetseng likhetho tse akaretsang tsa la 3 Phuptjane monongoaha ka khotso, ka matla, le ka likelello le lipelo tse pholileng, tse tsitsitseng.

.  
A re polotikeng FEELA re se kenye kapa ho theolela Motlotlehi leroleng leo la lipolotiki tsa rona.

.  
Sela le oele, seho se llile; taba li khutletse ho lona sechaba ho phetha tokelo ea lona ea ho ikhethela 'muso o ratoang ke lona.

.  
Lentsoe la sechaba ke Lentsoe la Molimo, etsoe sechaba ke poho.

.  
Ka moea o motle libapali!

.  
MOLIMO O BOLOKE MOTLOTLEHI KHOSI!

.  
MOLIMO O BOLOKE BASOTHO!!

.  
MOLIMO O BOLOKE LESOTHO!!!

